

**Date – 14/05/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. DoNER Minister Jyotiraditya Scindia an ram puma kuthnathawktute inthlunzawma hnathawh chu sawrkar laipui tum ani a ti a, Mizorama kuthnathawktute hmasawn nan theihtawp an chhuah tur thu a sawi.
2. NH 102B Package 2 hna a chhiat lutuk avanga lungawi lo, Ngopa JAC chuan wawiina Total Bandh an kalpui hnuah thuneitute hnen atanga thu lawmawm an dawnloh avangin NH102B chu tiamchin awm lovin dan chhunzawm ani dawn tih an sawi.
3. Manipur-a Zo hnahtlak Pastor pathum rawng taka thah an ni chu sawrkar hotulu leh political party bakah pawl hrang hrangin an dem thu an sawi.
4. Congress Party chuan Keralam Chief Minister atan V D Satheesan ruat anih thu an puang.



**MISSION GINGER : DoNER MINISTER**

DoNER Minister Jyotiraditya Scindia an ram puma kuthnathawktute inthlunzawma hnathawh chu sawrkar laipui tum ani a ti a, Mizorama kuthnathawktute hmasawn nan theihtawp an chhuah tur thu a sawi.

Nimin khan Ministry of DoNER hnuai cheng vbch 189. 78 senga kalpui tur Mizoram Ginger Unique Selling Proposition (USP) – Sustainable Cultivation & Value Chain Development Project Chief Minister Pu Lalduhoma nen an hawna ah he thu hi a sawi a, Pu Jyotiraditya Scindia chuan Mizoram sawhthing tha danglam tak chu zau zawka phochhuah anih tur thu a sawi.

Minister chuan India ram puma loneitute inthlunzawma hnathawh chu Prime Minister Pu Narendra Modi hmahlir ani tih sawiin kuthnathawktute dinhmun chawikang turin sawrkarin kawng hrang hrangin hma a la a ti a, Sawhthing tharchhuah hmangin Mizoram kuthnathawktute dinhmun chawikang turin theihtawp an chhuah tur thu a sawi a ni.

He project-a Sustainable Cultivation, Farm Mechanization leh a dangte hi Ministry dangte nena thawkho (Convergence) a kalpui tur a ni a, Post-Harvest Management & Processing erawh hi chu NEC (Focussed Development Component) Fund atanga thawh tur a tih a ni a. A thawh nan Rs. 30.13 Crore chheh hran a ni.

Nimina Project hawna inkhawm neih zawh veleh khan Ministry of DoNER chuan he sum Rs. 30.13 Crore hi NEC ah hian a sanction fel nghal a ni.



## **MISSION GINGER : CM**

Chief Minister Pu Lalduhoma'n sawhthing chu hmanlai pipute hunlai atanga Mizo nuna bet tlat ani a ti a, a danglam leh that bik avangin Unique Selling Proposition atana thlan ani a ti.

Mizoram Ginger Unique Selling Proposition (USP) – Sustainable Cultivation & Value Chain Development Project hawna ah he thu hi a sawi a, he hmalakna kaltlang hian kawng hrang hrangah mumal zawka sawhthing sawngbawl anih tur thu a sawi a ni.

Chief Minister chuan Mizoten sawhthing chi thum an chin thin zinga Thingpui leh Thinglaidumte chuan kum 2021 khan GI Tag a hmu a, kum 2025 khan chemicals residue endikna Eurofin Analytical Services, Bengaluru lamin an neih chu tha takin a paltlang tawh tih sawiin tun hnaiah Unique Selling Proposition atan thlan anih thu a sawi a ni.

Project hi scheme dangte nena convergence-a kalpui tur a ni a. Ruahman dan chuan Mizorama sawhthing thar tam ber District, Champhai District-a Mualkawiah Pilot Project angin a processing Hub bulpui ber din a ni ang a, hemi chawm turin a chhehvelah unit tenau deuh zawk (Spoke Hub) Tualcheng, Vaphai leh Zotlangah dah an ni dawn a, Hna hi kumin chhunga thawh zawh hman a, nakkum atanga processing kalpui theih tum a ni.



## **NGOPA TOTAL BANDH**

NH 102B Package 2 hna a chhiat lutuk avanga lungawi lo, Ngopa JAC chuan vawiina Total Bandh an kalpui hnuah thuneitute hnen atanga thu lawmawm an dawnloh avangin NH102B chu tiamchin awm lovin dan chhunzawm ani dawn tih an sawi.

Akashvani News thudawn danin NH 102B Package 2 hna a chhiat lutuk avanga Total Bandh huaihawt hian thlawp a hlawh hle a, Bandh neih chhung hian lirthei paltlang lui an awm loh thu duty ten an sawi, tual chhungah dawr inhawng an awm lova, duty te bak khawlaiah hmuh tur an awm lo a ni.

Ngopa Joint Action Committee chuan Total bandh an huaihawt chuan awmzia a neih loh avangin naktuk atangin tiam chin awm lovin kawngpui an dang dawn an ti a, zin veivak te nunphung a khaihlak dawn avangin hriatthiamna an ngen tih an sawi a ni.

## ***Voicecast***

*National Highway B102 hi Mizoram leh thenawm state Manipur inkalpawhna kawng pawimawh tak a ni a, he kawng siamtha tur hian Ngopa Joint Action Committee chuan thuneitute vawi tam tak anlo ngen tawh a, an ngenna in awmzia a neihloh avang hian Total Bandh hi huaihawt a ni a, kawng paltlang tum zin mite*

*tangkhang an awm niin Akashvani News chuan thu a dawng a, Ngopa khawtlang hruaituten thuneitute hnen atanga thu lawmawm an hmuh loh avangin kawng hi vawiin tlai atang khan tiam chin awm lovin khar a ni.*

<><><>

## **ADVISER TO CM**

Adviser to CM (Finance Planning) Pu TBC Lalvenchhunga chuan bank a thawktute chu mipuite tanpuitu ni tur leh mipuite ban phak service nei turin a chah.

He thu hi vawiina Union Bank of India Branch thar, Aizawl West Branch, Luangmual Vengthlang-a a hawnaah sawiin Pu TBC Lalvenchhunga chuan Bank rintlak tak an bial chhungah a awm chu lawmawm a tih thu a sawi a. Bank chu sum dah leh lak chhuahna, loan lakna ringawt angin mipuiten an hre thin a, bank a thawktute chu service provider an ni tih sawiin nasa taka ngaihtuahna seng a, an service neih ang angte mipuite hnen hman a, mipuite tanpuitu ni tur leh mipuite ban phak service nei turin a chah a. Union Bank of India Branch thar chu an bialin hma an sawn phah ngei a rin thu a sawi.

### ***Byte of TBC Lalvenchhunga***

Union Bank hian Mizoramah Branch 6 (Saitual, Khawzawl, Mamit leh Aizawl-ah branch 3) a nei a, district khawpui dangah te branch tam zawk hawn tum a ni. Mizorama Union Bank of India CD ratio chu SLBC report, December 2025-a a lan danin 97.08 a ni a, kumin April ni 30 thleng khan 150% a ni tawh a ni.

<><><>

## **NEW INCOME TAX ACT**

Sawrkar laipuiin chhiah chawi dan thar a duan New Income-Tax Act, 2025 chungchanga inzirtirna hun chu vawiin khan hman a ni.

Income-Tax Department, NER Aizawl buatsaiha Commissioner Taxation Dept Pisa, MINECO Auditorium-a hun hmanah hian, Commissioner of Income Tax Shillong Lalramsanga Sailo chuan New Income Tax Act 2025 dan thar ah chuan chhiah pek awlsam zawk a nihna te leh, lang tlang zawk leh mipui tana tha zawka kalpui tum a nih thu sawiin, mipui lam pawhin heng dan thar te hi ngaihven na chang hria a, hriatfiah duh an neih te pawh a khawihthu Department te zawhfiah hreh loa, a thawk tute pawhin tha taka lo dawngsawng turin a chah a ni.

New Income Tax Act 2025 hi kumin April ni 1 atang khan hman tan a ni a, vawiin hun hmanah hian sumdawng pawl hrang hrang, zirna in aiawh leh tlawmngai pawl hrang hrangte kalkhawmin zawhna leh chhanna hun hman a ni bawh.

<><><>

## **MIZORAM CONDEMN KILLING OF CHURCH LEADERS**

Manipur-a Zo hnahtlak Pastor pathum rawng taka thah an ni chu sawrkar hotulu leh political party bakah pawl hrang hrangin an dem thu an sawi.

Assembly Speaker Pu Lalbiakzama chuan thuchhuah siamin, nimina Kangpokpi leh Jangnomphai inkara Thadou Baptist Association (TBA)-a rawngbawltu pawisawilote rawng taka thahna thleng chu pawh a tih thu sawiin

pawikhawihute chu an phu ang ngeia dan hmanga hrem a nih theih nan thuneitute a ngen tih a sawi bawk.

ZPM General Headquarters, Aizawl pawhin pawl antih thu sawiin Mizo hnam laka pawl khawihna a ni tih tualthattute chuan hria se an duh thu an sawi a, thleng nawn tawh lo se an duh thu sawiin Zohnahthlakte himna leh muanna atan nghet takin a ding zel dawn tih an sawi bawk a ni.

Mizoram Pradesh Congress Committee (MPCC) pawhin Manipur-a Pastor pathumte rawng taka thahna chu pawl an tih thu sawiin an thihna chuan remna leh muanna nghet zawk a thlen ngei an beisei thu sawiin hliamte pawh dam thuai turin duhsakna an hlan tih an sawi a ni.

BJP Mizoram State President Dr. K. Beichhua, MLA chuan Manipur-a Zohnahthlak Pastor pathumte misual kut tuara Silai hmanga thah an ni chu BJP Mizoram chuan an dem takzet tih sawiin thil thlenga mawhphurtu misualte chu Manipur Sorkarin man chhuaka, hremna na tak pe turin an phut tih a sawi a ni.

Central YMA leh Zo Re-unification Organisation (ZORO) chuan lusun chhungte leh hliam tuarte an tawrhpu takzet a ti a, thil thleng chu pawl antih thu mawhphurtuten hremna an hmuh theih nan sawrkar laipui hma la turin an ngen a ni.

Mizorama kohhran hrang hrang intelkhawm Council of Churches in Mizoram (CCM) pawhin an dem thu sawiin Kristian zawng zawngte chu Manipur mipuite tan leh remna leh muanna tluantling a awm theihna tura tawngtaipui turin an chah a ni.

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### **FLORENCE NIGHTINGALE AWARDEE**

Florence Nightingale Award 2026 dawngtu Pi Lalenthangi Hnamte Health Worker chu vawiin khan Lengpui Airport ah ropui taka hmuah a ni.

Mizoram Health Multipurpose Service Association (MHMSA) chuan vawiin khan an member Pi Lalenthangi Hnamte chu Lengpui Airport ah an lo hmuak a, Tlabung Welfare pawhin lo hmuakin chawimawina hlan a ni.

Health Worker Tuichawng AHWC a thawk laiin Florence Nightingale Award 2026 dawngtu Pi Lalenthangi Hnamte chuan chawimawina a dawng chu lawmawm atih thu sawiin amah duhsaktute chungah lawmthu a sawi a ni.

<><><>

## REFUGEE INFLUX

Myanmar sipaiten mipui sipai kut atanga Khawmawi (Tiau) chhuhsak an tum ni-a sawi avangin tunlai hian Zokhawthar-ah raltlan an luh belh mek a. May ni 12 thleng khan mi 811 an lut tawh a, nimin lamah mi 11 luh belh lehin, tunhnaia raltlan Mizorama lut thar chu mi 822 an tling tawh a ni.

Zokhawthar Br. YMA hruaitute sawi danin raltlante hi Zokhawthar Police leh Assam Rifles-in lo dawngsawngin an chhinchhiah a, YMA in an awmna tur an ruahmanpui thu an sawi a. Raltlan lo lut zinga a tam zawk chuan an chhungte an bel a, in luah tur zawng pawh an nual tih an sawi a. Tunah hian Zokhawtharah raltlan sang 7 vel awm sa an awm mek a, hei hi Zokhawthar mipui aiin an tam zawk tih sawiin, raltlan awm sa an tam avang hian tun dinhmunah chuan buaipui ngai an awm hran lova, an chhungte belin an awm deuh vek tih an sawi.

Zokhawthar Br. YMA hruaitute chuan, ratlan hi a hma anga a hlawma lo lut an ni lova, buaipui pawh an harsa rih lo tih an sawi a. Hetihruah hian indo thawm a awm reng avangin a nawlpuia lo luh hun a awm theih avangin inrin lawk a ngaih thu an sawi a ni.

<><><>

## CONGRESS CM IN KERALAM

Congress Party chuan Keralam Chief Minister atan V D Satheesan ruat anih thu an puang. Ni 10 chhung zet Keralam Chief minister tur an thlan fel theih loh hnuah vawiin khan Congress hruaitu Ajay Maken, Mukul Wasnik leh Deepa Sasmunshi te chuan New Delhi-a chanchinbumite an kawmnaah an puang a. Heti hian Congress kaihhruai UDF tangruah chuan sawrkar siam turin hma an la chhunzawm nghal a ni. Keralam State Assembly inthlan neih zawh takah khan Congress kaihhruai UDF te hian Assembly seat hmun thuma thena hmun hnih an la a. Hetih lai hian Chief Minister tur ngaihtuahin hun rei tak hman a ni a. Party chhungah harsatna neuh neuh a awm hnuah vawiin khan an puang thei ta a ni

<><><>

## SIR

Mizoram tiamin Election Commission chuan Special Intensive Revision, SIR Phase-III tihna tur state 16 leh UT 3 a puang. Heng state te hi Mizoram bakah Andhra Pradesh, Arunachal Pradesh, Haryana, Jharkhand, Karnataka, Maharashtra, Manipur, Meghalaya, Nagaland, Odisha, Punjab, Sikkim, Tripura, Telangana, leh Uttarakhand te an ni a. Union Territories ah hain National Capital Territory of Delhi, Chandigarh leh Dadra and Nagar Haveli leh Daman and Diu te an ni. SIR hi voter list ennawn leh vote nei dik takte chauh an awm theihna tura rampuma hmalakna a ni.

<><><>